

Uunga siunnersuut: Meeqqat tapersorneqarnissaannut Inatsisartut inatsisaat nr. xx, xx xxx 2017-imeersoq

(Isumaginninnermut, Ilaqutarinnermut, Naligiisitaanermut Inatsinillu Atuutitsinnermut Naalakkersuisoq)

Akissuteqaat

(Isumaginninnermut, Ilaqutarinnermut, Naligiisitaanermut Inatsinillu Atuutitsinnermut Naalakkersuisoq)

Aappassaaneerinnineq

Meeqqat tapersorneqarnissaannut Inatsisartut inatsisissaattut siunnersuutip suliarineqarneranut atatillugu Ilaqutariinnermut Peqqissutsimullu ataatsimiititaliap sukumiisumik suliaqarneri aammalu siunnersuummik ilassinnilluarsimanera Naalakkersuisunit qutsavigiumavagut.

Ilaqutariinnermut Peqqissutsimullu ataatsimiititaliap isumaliutissiissummik suliaqarnerannut Naalakkersuisut aamma qutsavigiumavaat.

Isumaliutissiissummi ataatsimiititaliap § 19-imut, nalunaarutiginninnerni kommunit iliuuseqarnissamik pisussaaffii pillugit Naalakkersuisut allannguutissatut siunnersuusiornissaanik piunasaqarput.

Inassuteqaat Naalakkersuisunit allannguutissatut siunnersuummik suliaqarnikkut akuerineqarpoq, matumani Kommunalbestyrelsit paarsinerluttoqarsimaneranik, nakuusertoqarsimaneranik imaluunniit kinguaassiutitigut atornerluisoqarsimaneranik pasitsaassisoqarsimatillugu isumaginninnikkut misissuinissamik tuaviortumik aallartitsinissamik aalajangiinissaannut pisussaaffilerneqarlutik.

Ataatsimiititaliattaq piunasaqaatigaa Namminersorerullutik Oqartussat nalunaarusiaat isumaginninnikkut nakkutilliinnermut nalunaarut atorunnaarsinneqassasoq imaluunniit nutarsarneqassasoq.

Siunnersuut saqqummiunneqartoq tunngavigalugu Naalakkersuisut nakkutilliinnermut nalunaarutissatut missingersuusiamik suliaqarput, isumaginninnikkut suliaqarfimmi nakkutilliinnermut sukumiisumik ullumikkumullu pissutsinut naleqqussakkanik piunasaqaatinik peqqissaartumik imaqartumik. Maannarpiaq tamanut tusarniaassutigineqarpoq.

Pinaveersaartitsinerni kiisalu siusinaartumik meeqqamut suliniuteqarnerni paasissutissanik paarlaasseqatigiittarneq inatsisitigut tunngavissaqareerpoq. Matumunnga pineqartumut erseqqissaassutinnik allannguutissanik siunnersuusiortoqarnissaanut Ilaqutariinnermut Peqqissutsimullu ataatsimiititaliap isumaliutissiissusisamini ammallutik oqaatigivaat, taamaaliornikkut kommunini sullissisut oqilisaanneqassappata.

Naalakkersuisut taaneqartoq ilassilluarpaat periarfissallu suugaluartut meeqqat pisinnaatitaaffiisa nukittorsarneqarnissaannut tunngasut, taamaammatt allannguutissatut siunnersuummik suliaqartoqarluni.

Ulloq unnuarlu angerlarsimaffiit pillugit pisariaqartitat misissuivigineqarneri matumani suliassaqaarfimmi misissuinerit killiffissiorneri ataatsimiittitaliattaq apeqquteqaatigaa kiisalu missingersuusiat misissuivigineqarneri ilanngullugit. Ilisimatitsissutigineqassaaq suliat suli ingerlanneqarmata.

Ataatsimiittitaliap aammattaq inatsisissatut siunnersuummi ilaqutariinnut paarsisartunut piunasaqaatit minnerpaaffilerneqarnissaannik imaluunniit pitsaassutsip minnerpaaffissaanik killiliisoqarnissaanik kommunit pisussaaffilerneqarnissaannik ilanngussisoqarsimanginnera paasissutissiissutigeqqaat.

Ilaqutariinnut paarsisartunut nalunaarutissaq Naalakkersuisunit suliarineqarpoq, tassuunalu qulakkeerneqarluni ilaqutariit paarsisartut pikkorissarneqartarnissaat. Matumuuna Naalakkersuisut qulakkeerpaat kommunalbestyrelsit ilaqutariinnut paarsisartunut minnerpaamik angajoqqaarsiaanissamut piareersarneqartarnissaat. Ilaqutariinnut paarsisartunut nalunaarusiassamut siunnersuut maanna tusarniaassutigineqarpoq.

Taama oqaaseqaateqarlutik Naalakkersuisut siunnersuut inatsisartuni suliassangortillugu inassutigaat.